

BOSNA I HERCEGOVINA  
FEDERACIJA BOSNE I HERCEGOVINE  
TUZLANSKI KANTON  
OPĆINSKI SUD U TUZLI  
Broj : 32 0 St 445746 23 St  
Tuzla, 27.09.2023. godine

Općinski sud u Tuzli, stečajni sudija Vedran Milašinović, u postupku prethodnog ispitivanja prijedloga za otvaranje stečajnog postupka nad dužnikom „KARITEX“ d.o.o. za proizvodnju, promet i usluge Lukavac, ul. Gnojnica 150, dana 27.09.2023. godine donio je slijedeće,

#### RJEŠENJE

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom privrednog društva „KARITEX“ d.o.o. za proizvodnju, promet i usluge Lukavac, ul. Gnojnica 150.

Za privremenog stečajnog upravnika imenuje Nedim Unkić iz Gradačca, ul. Gazijska bb.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju, a naročito:

- obezbijediti imovinu dužnika i starati se o istoj,
- ima ovlaštenja da uđe u poslovne prostorije dužnik i provede neophodne radnje,
- utvrditi da li postoji razlog za otvaranje stečajnog postupka,
- ispitati da li će imovina stečajnog dužnika pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka i
- uraditi kontrolu poslovanja stečajnog dužnika.
- kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama F BiH“, web stranici Općinskog suda u Tuzli i na Internet stranici FIA-e, te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Lukavcu i Službi za geodetske i imovinsko-pravne poslove Grada Lukavac, radi upisa zabilježbe otvaranja prethodnog postupka.

#### Obrazloženje

„KARITEX“ d.o.o. za proizvodnju, promet i usluge Lukavac, ul. Gnojnica 150, kao dužnik podnio je dana 04.05.2023. godine ovom sudu prijedlog za otvaranje stečajnog postupka nad ovim privrednim društvom, zbog platežne nesposobnosti stečajnog dužnika.

Stečajni sudija nakon što je utvrdio da je prijedlog za pokretanje stečajnog postupka podnesen od strane ovlaštenog predlagача u smislu odredbe člana 58. stav 1. i 2. Zakona o stečaju („Sl. novine F BiH“, br.53/2021. u daljem tekstu Zakon o stečaju) i da je isti dopušten, dana 21.07.2023. godine, naložio je predlagачu da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka.

Predlagач „KARITEX“ d.o.o. za proizvodnju, promet i usluge Lukavac, ul. Gnojnica 150, je dana 09.08.2023. godine dostavio sudu dokaz o uplati predujmljenih sredstava za finansiranje prethodnog postupka u iznosu od 3.000,00 KM.

Na osnovu priložene dokumentacije i to: aktuelni izvod iz sudskog registra od 06.06.2023. godine, potvrda od NLB banke od dana 07.06.2023. godine, izjava Šemse Huskanović od 20.06.2023. godine, odluka o prestanku poslovanju društva od 17.04.2023. godine, uvjerenje službe za urbanizaciju imovinske i geodetske poslove Lukavac od 03.05.2023. godine, uvjerenje zemljišnoknjižnog ureda Lukavac od 03.05.2023. godine i uplate predujmljenih sredstava za finansiranje prethodnog postupka u iznosu od 3.000,00 KM, predlagач je učinio vjerovatnim platežnu nesposobnost.

Na ročištu za saslušanje stečajnog dužnika održanog dana 21.07.2023. godine, zakonski zastupnik društva Adisa Burgić izjavila je da društvo ne posluje od februara 2008. godina. Društvo nema zaposlenika. Društvo nema imovine, ne posluje od 2008. godine pa do danas, tako da se nije mogla sa sigurnošću izjasniti da li postoje neka dugovanja ili ne. Upravljanje društvom je preuzela 2008. godine od člana porodice i društvo od tada nije obavljalo bilo kakvu djelatnost.

S obzirom da iz izjašnjenja zastupnika proizilazi da društvo nema imovinu, sud se radi utvrđivanja postojanja dugovanja obratio nadležnom poreznom organu, te je podneskom Porezne uprave od 30.08.2023. godine obaviješten da društvo ima dug po osnovu javnih prihoda od najmanje 15.997,16 KM, slijedom čega je prestanak društva moguće ishoditi isključivo kroz stečajni postupak.

Iz svega navedenog proizilazi da društvo nije u mogućnosti izvršavati svoje dospjele obaveza od momenta dospijeća u neprekidnom trajanju dužem od 60 dana od dana nastanka obaveze. Konačno stanje u pogledu eventualno drugih obaveza bi se moglo utvrditi u slučaju određivanja privremenog stečajnog upravnika koji bi sudu dostavio izvještaj o poslovnom stanju kod predlagача sa izjašnjenjem o uslovima za otvaranje stečaja.

Na osnovu podnesene dokumentacije i zakonskog zastupnika stečajnog dužnika, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju.

Odluka iz stava 3. ovog rješenja donesena je temeljem odredbe člana 63. Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. Zakona o stečaju.

Na osnovu navedenog, temeljem citiranih odredbi zakona, sud je odlučio kao u izreci rješenja.

Stečajni sudija  
Vedran Milašinović

**POUKA O PRAVNOM LIJEKU:** Protiv ovog rješenja dozvoljena je žalba u roku od 8 (osam) dana, računajući od dana objavljivanja. Žalbu mogu uložiti stečajni dužnik i privremeni stečajni upravnik. Žalba se podnosi Kantonalnom sudu putem ovog Suda.